



Sur Christian Monn

7.12.1923 – 3.7.2007

Nossa veta sin tiara ei sco in viadi sur cuolms e tras vals. Jeu vi descriver cuortamein il decouors dalla veta da sur Christian:

Sur Christian ei naschius ils 7 da december 1923 a Rueras. Ses geniturs Gion Antoni e Ludivina Monn-Bier han aunc giu in fegl, Giachen Antoni, ch'ei naschius e morts igl onn 1925, cuort suenter sia naschientscha e siu s. Batten.

Suenter la scola primara a Rueras ei il giuven Christian ius a Mustér a scola, ha fatg leu il gimnasi e la matura igl onn 1944. Lu ha el cuntuau sia scolaziun el seminari da spirituals a Cuera. L'Ordinaziun sacerdotala ha el retschiert ils 4 da fenadur 1948 e festivau sia Messa nuviala ils 18 da fenadur a Sedrun.

Da 1949-1950 ei sur Christian professer e vice-prefect el collegi da Maria Hilf a Sviz e puspei da 1953-1963. Denteren sescolescha el vinavon a Turitg e Neuchatel, specialmein el lungatg franzos. Da 1963- 1974 docescha sur Christian religiun e franzos el seminari da scolasts a Cuera.

Lu survegn la veta da sur Christian ina viulta. Igl onn 1974 vegn el nominaus entras uestg Gion Vonderach canoni dil capetel catedral a Cuera e daventa lu beinspert era decan dil capetel. El surpren oravontut il quita per la catechesa ora ellas pleivs.

Igl onn 1989, cu sur Wolfgang Haas daventa uestg da Cuera, remetta sur Christian tut ses uffecis e tetels e seretila a Rueras en sia casa paterna. Sur Christian fuva in carstgaun cun fin sentiment ed ha mai propri pudiu supportar cumbats e malperinadads, sco ei ha dau dil temps d'uestg Haas.

Cu sur Christian ha sentiu che sia memoria entscheveva a disdir, ha el priu dimora igl onn 2000 en Casa s. Vigeli a Sedrun, nua ch'el ei morts ils 3 da fenadur 2007. Quei medem di ei era sur Placi Huonder morts en Casa s. Vigeli ell'autla vegliadetgna da 97 onns. Els dus ein vegni satrai ensemble ils 5 da fenadur el santeri da Sedrun. Uestg Amédée Grab e bia confrars e bia pievel han accumpaignau alla fossa dus premurai e fideivels spirituals.

En tut ses onns, dapi sia Ordinaziun ei sur Christian segidaus pruamein era ellas pleivs. El fuva bugen denter il pievel, fuva in carstgaun sempel, beinvulent e reconcilont, ch'insstueva ver bugen. Ussa ei siu viadi sur cuolms e tras vals ius a fin. Veglien ils dus buns pasturs, sur Christian e sur Placi, rugar Diu era per novas clamadas spiritualas.

Sur Martin Bearth